

Sarajevo, 12.12.2024.godine

**Klub SDP-a u Skupštini Kantona Sarajevo**  
**Predsjednik kluba zastupnika Davor Čičić**

ZA:

**BOSNA I HERCEGOVINA**  
**FEDERACIJA BOSNE I HERCEGOVINE**  
**KANTON SARAJEVO**  
**SKUPŠTINA KANTONA SARAJEVO**  
**n/r Vlada Kantona Sarajevo**  
**n/r Ministarstvo za boračka pitanja KS**

**U skladu sa članom 106. i 213. Poslovnika Skupštine Kantona Sarajevo, dostavljam:**

### **ZASTUPNIČKA INICIJATIVA**

Prema Vladi Kantona Sarajevo, Ministarstvu za boračka pitanja Kantona Sarajevo

Da Ministarstvo za boračka pitanja Kantona Sarajevo razmotri mogućnost osnivanja Veteranskog centra za boračku populaciju KS i pošalje pismo namjere za otkup od sadašnjih vlasnika, uz zahtjev za dostavu njihove ponude za prodaju i planira sredstva za otkup u Prijedlogu budžeta Kantona Sarajevo 2025.g. za objekat bivšeg Doma penzionera Novo Sarajevo, ulica Aleja lipa 56, lociran na k.č. 1151 K.O. Novo Sarajevo II kao objekat značajan za kulturno historijsko naslijeđe KS u kojem bi se uspostavio navedeni Veteranski centar.

### **OBRAZLOŽENJE**

Zavod za zaštitu kulturno historijskog i prirodnog naslijeđa KS u svom mišljenju broj 1376/23, Z14, Z20 od 12.10.2023. godine je naveo da na osnovu preliminarnog pregleda objekta i ambijenta u kojem je lociran, objekat bivšeg Doma penzionera u ulici Aleja lipa 56, lociranog na k.č. 1151 K.O. Novo Sarajevo II, zaključuje da objekat posjeduje i arhitektonsku i ambijentalnu vrijednost i da bi kao takav trebao biti sačuvan i zaštićen.

U tom mišljenju je još navedeno da je Objekat građen 64 godine prošlog stoljeća kao namjenski objekat za stara i iznemogla lica (starački dom). Izvornost i funkcija su mu jasno čitljivi i tipični su za internacionalni stil arhitekture. Objekat je izuzetno skladnih proporcija i svojim položajem i smještajem u prostoru predstavlja neodvojiv segment kompozicione cjeline u urbanističkoj postavci objekata okolnog prostora. Egzistirajući u izvornom obliku ovaj objekat je rijedak primjerak izvorno stilski sačuvane arhitekture objekata internacionalnog stila u Kantonu Sarajevo. Dom penzionera je bio prvi objekat takve vrste u gradu Sarajevu i Bosni i Hercegovini sa tada 42 ležaja i javnom kuhinjom za ishranu samohranih penzionera iz grada.

U vrijeme agresije na BiH i opsade Sarajeva u navedenom objektu se nalazio i štab Armije Bosne i Hercegovine odakle se rukovodila odbrana Trga Heroja, naselja Hrasno, a time i odbrana grada u cjelini, što mu kao takvom daje dodatnu povijesnu vrijednost objekta koji treba zaštititi i radi njegovanja kulture sjećanja i kao potencijalnog spomen obilježja ili eventualno muzeja jedinice Armije BiH koja je u njemu u tom razdoblju boravila. Zbog toga dostavljam inicijativu Ministarstvu za boračka pitanja kako bi potencijalno podržali inicijativu

zaštite, otkupa od sadašnjih vlasnika i renoviranja ovog objekta u izvornom obliku za potrebe osnivanja Veteranskog centra za boračku populaciju u KS po uzoru na slične centre npr. u Republici Hrvatskoj.

Djelokrug rada Veteranskog centra KS bi bio pružanje: podrške i usluga boračkoj populaciji kroz program boravka ili smještaja, usluga psihosocijalne pomoći i podrške, usluga savjetovanja i pomaganja, psihološke djelatnosti, radno terapijske usluge, rekreacijske i rehabilitacijske usluga, kinezioloških programa i fizikalne rehabilitacije, usluga promicanja zdravlja, promicanja vrijednosti kulture sjećanja, organizacija kulturno-umjetničkih događanja, organizacije edukacija, radionica i tečajeva, usluga sportske rekreacije i poduke, organiziranja sportskih natjecanja, organiziranja mobilnih timova za pružanje podrške i usluga boračkoj populaciji, te ostale popratne usluge i ostali oblici podrške i usluga boračke populacije populaciji.

U Veteranskom centru bi korisnicima na raspolaganju bio multidisciplinarni tim (psiholog, socijalni radnik, fizioterapeut, kineziolog, radni terapeut, medicinske sestre/tehničari, njegovateljice, administrativno osoblje). Veteranski centri su istovremeno i centri razvoja u kojima se pruža savjetodavna pomoć, edukacije kroz različite radionice, seminare, treninge, osnažuje potencijal korisnika za zapošljavanje i poduzetništvo te uključivanje u rad boračkih udruženja kao dio radne terapije. Sveobuhvatnim pristupom na jednom mjestu omogućava se podizanje kvalitete življenja korisnika kao i njihovog socio-ekonomskog položaja, a uloga veteranskih centara očituje se prvenstveno u poboljšanju općeg stanja korisnika i njihovom uključivanju u društvenu zajednicu.

U vezi svega gore navedenog pokrećem zastupničku inicijativu da Vlada KS i Ministarstvo za boračka pitanja razmotri mogućnost otkupa od trenutnih vlasnika, pošalje pismo namjere trenutnim vlasnicima za otkup ove za kanton Sarajevo vrijedne građevine kao i da u Budžetu KS za 2025. planira sredstva za potencijalni otkup. Time bi postigli širu korist za društvenu zajednicu zaštitili i stavili u funkciju vrijedan objekat za kulturno historijsko naslijeđe Kantona Sarajevo i u njemu osnovali Veteranski centar za boračku populaciju KS po meni iznimno bitnu ustanovu.

S poštovanjem,

**Davor Čičić**  
**Predsjednik kluba zastupnika SDP BiH**  
**u Skupštini Kantona Sarajevo**